

793—804 conspectu domini Dei altissimi; et humilem habeas conversationem inter fratres, et sollicitudinem magnam regularis vitae, quia qui^a maius portat iudicium, maiorem accipit honorem. Quid tibi saeculi dignitas, quae sicut flos feni decidit? Nolo te vagabundum^b esse per loca, sed stabilem in servitio Dei, ubi electus es in servitium Christi. Vivas inter fratres quasi Lucifer inter stellas¹, ut plurimi tuis bonis exhortentur exemplis. Sicut ego curam habui de salute animae tuae, ita tu curam habeas de salute multorum. Noli torrem de incendio raptum desperare, sed paenitentiae fonte extingui, quatenus qui in flamma libidinis exarsit, in flamma caritatis et munditiae luceat in conspectu Dei. Tu scis fragilitates adulescentiae, tu nosti flumen iniquitatis, quomodo per praecipitia rapiuntur multi in voragines diversae luxoriae. Quapropter sollicita mente labora Deo adiuvante, ut quam plurimos per admonitiones dulcissimas ab errore iniquitatis revoces. Erit tibi maxima merces apud Deum, si salutem fraternam non neglexeris.

Plurimi sunt nomine tenus doctores, sed pauci karitatis officio. Non cesses seminare verbum Dei; Deus novit, ubi vult, ut cadat. Nullatenus tibi illius bonitas deerit in remuneratione. Qui converti fecerit peccatorem ab errore viae suae, cooperit multitudinem peccatorum suorum. Vivas utinam in mansuetudine patientiae et humilitate et obedientiae et caritatis dulcedine inter fratres, quatenus misericordia redemptoris nostri te florere faciat in vario virtutum genere, et ab omni adversitate clementer custodire dignetur.

Saluta, obsecro, fratres nostros, quoscumque scias aliquo caritatis officio mihi esse coniunctos, et semper admoneas de orationibus meis quoscumque habeas amicos, vel Deum timentes, vel sanctae conversationis socios. Vivite^c in omni caritate et valete in aeternum.

284.

Alcvinus monachos S. Petri Wiremuthenses rogat, ut sui meminerint. Monasterium eorum laudibus prosequitur. Virtutem suadet. 793—804.

Cod. H fol. 30—31'.

Edd. F 219, Haddan and Stubbs Councils III, 470, J 274. — Migne col. 167.

SANCTISSIMIS IN SANCTI PETRI ECCLESIA FRATRIBUS DEO SERVIENTIBUS HUMILIS CLIENTELLUS ALCHVINUS PERPETUAE GLORIAE SALUTEM.

Saepissime corporali^a specie amici disiunguntur, sed numquam caritatis dulcedine separari debent. Et ubi vera est dilectio, ibi firma est germanitatis memoria; ubi radix conductae amicitiae in pectoris thesauro figitur, inde rami floribus fidei vestiti^b pululasse certissimum est, usque dum fructibus aeternae beatitudinis refecerint^c veram habentes inter se caritatem. Quam ego opto de mea parvitate vestris firmiter inhaerere mentibus, sicut olim mihi antecessores vestri pia voluntate promiserunt.

Locus vero habitationis vestrae mihi valde desiderabilis fuit, licet me condicio peregrinae conversationis longe tulisset a vobis²; quamvis corpore, sed nullatenus caritate. Quia omnia, quae apud vos videbam, sive in habitationibus domorum sive in conversatione vitae regularis, valde mihi placuerunt; et utinam ut Deo semper placeat pietatis vestrae oboedientia et humilitas et regularis vitae observatio.

283. ^a) quia mai. port. iud. qui corr. *Frob.* ^b) vacabundum *H.* ^c) vivete *H.*

284. ^a) corporalis *H.* ^b) sic *J.* ^c) reficerint *H.*

1) *Cf. supra p. 311 n. 5.* 2) *in regnum Francorum.*